

## Барлавийлар ҳақида

21:13 / 22.04.2016 4349

**Савол:** Ассаламу алайкум, ҳурматли Шайх Ҳазратлари! Дин йўлида қилаётган ишларингизга Роббимиз барака берсин. Ҳиндистонда Барлавийлар деган йўналиш бор экан. Уларнинг эътиқодлари исломга қанчалик тўғри келади? Ҳозирда бизнинг юртга ҳам уларнинг эътиқодлари ва китоблари кириб келаётган экан. Шу ҳолатга муносабатингизни билмоқчи эдим.

**Жавоб:** Аввало ушбу саволни йўллаганингиз учун ташаккур. Ҳамма ва ҳар доим шундай бўлиш керак. Ҳозирги кунда ҳамма нарса аралаш - қуралаш бўлиб кетди. Эҳтиёт бўлмаган одам адашиб қолиши ҳеч гап эмас.

Сиз сўраётган Барлавийлар тоифаси ҳақидаги қисқача маълумот қўйидагилардан иборат;

- Барлавийлар тоифаси Ҳиндистоннинг Абродеш вилоятининг Барилий шаҳарида пайдо бўлгани учун "Барлавийлар" номини олган. Бу тоифа британия мустамлакаси даврида пайдо бўлган. Улар анбиёлар ва авлиёлар борасида ўта шиддатли ғулувга кетганлари билан машҳур бўлганлар. Бу тоифанинг асосчиси Аҳмад ризохон ибн Тақий Алихон деган кимса бўлиб, у 1272 - 1340 ҳижрий саналарда яшаб ўтган. У ўзини Абду Мустафо деб атаган. Бу Набий соллаллоҳу алайҳи васалламнинг бандаси деган маънони англатади ва мусулмонларда бу исмни инсонга қўйиш мумкин эмас.

Барлавийлар жумаладан қўйидагилар ақийдаларга ишонишади;

1. Расулуллоҳ соллаллоҳу алайҳи васаллам Аллоҳ таолонинг мутлақ ноибидирлар. Оламнинг барчаси У зотнинг тасарруфидадир. Набий соллаллоҳу алайҳи васаллам оламда нимани истасалар шуни қиладилар. Нимани, кимдан истасалар оладилар. У кишининг амрини рад қилувчи йўқ ва шунга ўхшаш нарсалар....

2. Набий соллаллоҳу алайҳи васаллам дан кейин борлиқни авлиёлар тасарруф қиладилар.

3. Расулуллоҳ соллаллоҳу алайҳи васалламни илоҳлик даражасига кўтарадилар.

4. Набий соллаллоҳу алайҳи васалламнинг башарликларини инкор қиладилар. У киши ҳамма жойда, ҳамма вақтда ҳозир нозир дейдилар.

Бунга ўхшаш бузуқ ақийдалари кўп. Уларнинг адашагани ҳақида кўплар китоблар, мақолалар ёзилган, фатволар чиқарилган. Улардан эҳтиёт бўлиш керак. Китобларини ўқиммаслик керак. Сизга яна бир бор ташаккур!